



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 223 Prot.

Tiranë, më 6 / 2 /2017

VENDIM

Nr. 09, datë 6 / 2 /2017

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi/ Komiteti Shqiptar i Helsinkit, përfaqësuar nga Znj. , ka depozituar pranë Zyrës së Komisionerit ankesën nr. 1452Prot., datë 13.12.2016, ndaj Autoritetit Publik/ Ministrisë së Punëve të Brendshme me objekt “Ankim ndaj refuzimit për dhënie të informacionit dhe kopje të dokumentave zyrtare”.

Ankuesi në cilësinë e kërkuarit, me shkresën nr. 498-498/2, datë 27.10.2016 ka kërkuar nga Ministria e Punëve të Brendshme t’i vihet në dispozicion informacioni dhe dokumentacioni i disponueshëm si më poshtë vijon:

- a) Nëse institucioni juaj ka hartuar planin vjetor që lidhet me procesin e vendimmarrjes të vitit 2015 dhe 2016, bazuar në nenin 6, pika 1, gërma “b” e Ligjit Nr.146/2014 “Për njoftimin dhe konsultimin publik”. Nëse po lutemi të na përcillni kopje të këtyre planeve.
- b) Cilat janë format dhe mënyrat me anë të të cilave janë bërë publike këto plane vjetore? Nëse publikimi është bërë gjithashtu me anë të internetit, lutemi të na përcillni adresën ndërlidhëse (linkun përkatës).
- c) Listën e projekt-akteve (projektligje, projekt strategji, politika me interes të lartë publik) që janë përfunduar së hartuari nga institucioni juaj brenda periudhës Janar – Tetor 2016. Cilat nga këto projekt-akte i janë nënshtruar procesit të njoftimit dhe konsultimit publik? Për ato projektakte që nuk i janë nënshtruar këtij procesi, lutemi të na informoni mbi arsyet përkatëse.
- d) Kopje të njoftimeve publike për procesin e konsultimit publik që janë bërë për secilin projekt – akt që i është nënshtruar këtij procesi sipas nenit 6/a dhe 11/1 të Ligjit Nr.146/2014, si dhe kopje të njoftimeve për konsultime të drejtpërdrejta dhe takime publike me palët e interesuara sipas nenit 6, pika 2 e këtij ligji, për periudhën Janar-Tetor 2016.
- e) Kopje të ftesave, axhendave, listë prezencave dhe procesverbaleve të mbajtura në takimet publike të organizuara për konsultimin publik për secilin projektligji/projektstrategji/projektpolitike sipas nenit 18 të ligjit Nr.146/2014, për periudhën Janar-Tetor 2016.

- f) *Kopje të përmbledhjeve të rekomandimeve të pranuarra dhe arsyeve të mospranimit të rekomandimeve për çdo projekt akt që i është nënshtruar procesit të konsultimit gjatë periudhës Janar-Tetor 2016 sipas nenit 19, pika 3 të Ligjit Nr.146/2014.*
- g) *Kopje të raportit të transparencës për procesin vendimmarrës të institucionit tuaj për vitin 2015 dhe linkun ku këto raporte janë publikuar sipas nenit 20 të Ligjit Nr.146/2014.*
- h) *Informacion lidhur me ankesat e palëve të interesuara për cënim të së drejtës për njoftim dhe konsultim publik dhe ecurinë e shqyrtimit të tyre nga Institucioni Juaj, sipas nenit 21 të ligjit Nr.146/2014, për periudhën Janar-Tetor 2016.*

Me shkresën nr.7259/1 Prot., datë 09.11.2016, Autoriteti Publik ka kthyer përgjigje duke sqaruar ndër të tjera se: *“...Ministria e Punëve të Brendshme ka publikuar regjistrin e programit të përgjithshëm analitik të projekt-akteve për vitin 2016. Ju përcjellim projekt-aktet që janë përfunduar së hartuari për periudhën Janar-Tetor 2016 dhe që i janë nënshtruar procesit të njoftimit dhe konsultimit publik, duke sqaruar edhe mënyrën e bërjes së njoftimit për grupet e interesit. Në adresën e emailit të koordinatorit për njoftimin dhe konsultimin publik, publikuar në faqen zyrtare të MPB në web, mund të depozitohen mendime, sygjerime vërejtje apo opinione mbi nismat ligjore të Ministrisë së Punëve të Brendshme.”*

Pas përgjigjes së dhënë nga Autoriteti Publik/Ministria e Punëve të Brendshme, ankuesi pretendon se është cënuar në të drejtën për informim, pasi nuk është informuar lidhur me sa ka kërkuar dhe për këtë arsye ka depozituar ankim pranë Zyrës së Komisionerit. Në këto kushte ankuesi kërkon nga KDIMDP, ushtrimin e kompetencave që ju njih ligji për rastet e refuzimit të dhënies së informacionit si dhe urdhërimin e dhënies së informacionit/dokumentacionit nga autoriteti publik.

Në ndjekje të procedurës për shqyrtimin administrativ të çështjes, Komisioneri me qëllim marrjen e një vendimi sa më objektiv, në zbatim të nenit 24/3 të ligjit nr.119/2014 “Për të drejtën e informimit” në të cilin citohet se *“Me marrjen e ankesës, Komisioneri për të Drejtën e Informimit dhe Mbrojtjen e të Dhënave Personale ...kur e sheh të nevojshme, zhvillon një seancë dëgjimore publike me pjesëmarrjen e palëve”*, vlerësoi zhvillimin e një seance dëgjimore përpara marrjes së vendimit përfundimtar. Me shkresën nr. 20/15 Prot., datë 05.01.2017, Zyra e Komisionerit njoftoi palët në një seancë dëgjimore në datën 16.01.2017. Në seancë dëgjimore, pala ankuese dhe përfaqësuesit e Autoritetit Publik paraqitën qëndrimet e tyre lidhur me rastin, duke rikonfirmuar qëndrimet e tyre të reflektuara në aktet shkresore të trajtuara më sipër.

Pas shqyrtimit të ankesës, si dhe pas konsultimit të legjislacionit përkatës rezulton se, dokumentacioni i kërkuar në pikat e kërkesës së Komitetit Shqiptar të Helsinkit, informacion i administruar nga Autoriteti Publik është vendosur pjesërisht në dispozicion ankuesit. Lidhur me dokumentacionin që Autoriteti Publik nuk ka vendosur në dispozicion, më konkretisht:

1. *Informacion nëse Ministria e Punëve të Brendshme ka hartuar një plan vjetor që lidhet me procesin e vendimmarrjes për vitin 2015, një kopje të tij sipas nenit 6, pika 1/b, të ligjit nr.146/2014 “Për Njoftimin dhe Konsultimin Publik”. Arsyet se përse një pjesë e projekt-akteve të planifikuara për t'u hartuar në periudhën Janar-Tetor 2016, nuk i janë nënshtruar procesit të njoftimit dhe konsultimit publik.*
2. *Kopje të njoftimeve publike për ato projekt-akte që i janë nënshtruar procesit të konsultimit publik, kopje të njoftimeve për konsultimet e drejtëpërdrejta dhe takimet publike me palët e interesuara, si dhe komentet me sygjerimet e dërguara nga këto palë, bazuar në nenet 6, pika 1/a dhe 11/1, të ligjit nr. 146/2014 “Për Njoftimin dhe Konsultimin Publik”.*
3. *Gjithashtu, ftesat, axhendat, listë-prezencat dhe të gjitha procesverbalet e mbajtura në takimet publike të organizuara për projekt-aktet e konsultuara, mendimet e dërguara nga palët e*

interesuara për këto projekt-akte si dhe kopjet me përmbledhjet me arsyet e mospranimit të rekomandimeve sipas nenit 18, 19, pika 3, të ligjit nr. 146/2014 "Për Njoftimin dhe Konsultimin Publik"

4. Kopje e raportit të transparencës për procesin vendimmarrës për vitin 2015, si dhe informacion lidhur me ankesat e palëve të interesuar për cënim të së drejtës për njoftim dhe konsultim publik, bazuar në nenet 20 dhe 21, ligjit nr. 146/2014 "Për Njoftimin dhe Konsultimin Publik"

Zyra e Komisionerit vlerëson se, dokumentacioni i kërkuar përmbën informacion publik në kuptim të pikës 2, të nenit 2, të Ligjit nr.119/2014 "Për të drejtën e informimit", "informacion publik" konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik" dhe si i tillë, duhet vendosur në dispozicion të kërkuarit Komiteti Shqiptar i Helsinkit, nëse ky informacion disponohet nga Autoriteti Publik.

Theksojmë, se e drejta për t'u informuar është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

Në këto kushte, në lidhje me ankesën e Komitetit Shqiptar të Helsinkit, përfaqësuar nga Znj. , ndaj Autoritetit Publik/ Ministria e Punëve të Brendshme, Komisioneri vlerëson se ankesa është e bazuar në ligj dhe si e tillë ajo duhet pranuar.

PËR KËTO ARSYE

Bazuar në shkronjat b) dhe ç) të pikës 5 të nenit 24, nenit 25 të ligjit nr.119/2014 'Për të drejtën e informimit', shkronjën a) të pikës 1 të nenit 18 të ligjit nr 49/2012 'Për organizimin dhe funksionimin e gjykatave administrative dhe gjykimin e mosmarrëveshjeve administrative',

V E N D O S A:

1. Pranimin e ankesës së Komitetit Shqiptar të Helsinkit, përfaqësuar nga Znj. , nr. 1452 Prot., datë 13.12.2016, ndaj Autoritetit Publik/ Ministrisë së Punëve të Brendshme, me objekt "Ankë ndaj refuzimit për dhënie të informacionit dhe kopje të dokumenteve zyrtare".
2. Urdhërimin e Autoritetit Publik/Ministria e Punëve të Brendshme, për vënien në dispozicion të dokumentacionit të kërkuar sipas objektit të kërkesës (shkresa nr. 498-498/2, datë 27.10.2016), brenda datës 13. 2 .2017.
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni e këtij vendimi.
4. Ky vendim u dha sot në datë 6. 2 .2017.

